

大般若波羅蜜多經卷第四百四十二

唐三藏法師玄奘奉 詔譯

第二分佛母品第四十六之二

復次善現甚深般若波羅蜜多。不示現色。不示現受。想行識。不示現眼處。不示現耳鼻舌身意處。不示現色處。不示現聲香味觸法處。不示現眼界。不示現耳鼻舌身意界。不示現色界。不示現聲香味觸法界。不示現眼識界。不示現耳鼻舌身意識界。不示現眼觸。不示現耳鼻舌身意觸。不示現眼觸爲緣所生諸受。不示現耳鼻舌身意觸爲緣所生諸受。不示現地界。

不示現水火風空識界。不示現無明。不示現行識名色六處觸受愛取有生老死。不示現布施波羅蜜多。不示現淨戒安忍精進靜慮般若波羅蜜多。不示現內空。不示現外空。內外空空。大空。勝義空。有爲空。無爲空。畢竟空。無際空。散無散空。本性空。自共相空。一切法空。不可得空。無性空。自性空。無性自性空。不示現真如。不示現法界法性。不虛妄性。不變異性。平等性。離生性。法定法住。實際虛空界。不思議界。不示現苦聖諦。不示現集滅道聖諦。不示現四靜慮。不示現四無量。四無色定。不示現八解脫。不示現八勝處。

九次第定。十遍處。不示現四念住。不示現四正斷。四神足。五根。五力。七等覺支。八聖道支。不示現空解脫門。不示現無相無願解脫門。不示現淨觀地。不示現種性地。第八地。具見地。薄地。離欲地。已辦地。獨覺地。菩薩地。如來地。不示現極喜地。不示現離垢地。發光地。燄慧地。極難勝地。現前地。遠行地。不動地。善慧地。法雲地。不示現五眼。不示現六神通。不示現如來十力。不示現四無所畏。四無礙解。大慈。大悲。大喜。大捨。十八佛不共法。不示現三十二大士相。不示現八十隨好。不示現無忘失法。不示現恆住捨性。不示現預

流果。不示現一來不還阿羅漢果。獨覺菩提。不示現一切菩薩摩訶薩行。不示現諸佛無上正等菩提。不示現轉妙法輪。不示現度有情類。不示現嚴淨佛土。不示現成熟有情。不示現一切陀羅尼門。不示現一切三摩地門。不示現一切智。不示現道相智。一切相智。何以故。善現。如是般若波羅蜜多甚深義中。甚深般若波羅蜜多。尚無所有不可得。況有色受想行識。乃至一切智道相智一切相智可得示現。復次善現。一切有情。三界五趣。施設言說。若有色。若無色。若有想。若無想。若非有想。非無想。若此世界。若餘十方無

量無數無邊世界。是諸有情。若略心。若散心。或善或不善。或無記。一切如來應正等覺。依深般若波羅蜜多。皆如實知。善現。云何如來應正等覺。於諸有情。略心散心。或善或不善。或無記。依深般若波羅蜜多。皆如實知。善現。一切如來應正等覺。依深般若波羅蜜多。由法性故。能如實知諸有情類。略心散心。或善或不善。或無記。時具壽善現。白佛言。世尊。云何如來應正等覺。依深般若波羅蜜多。由法性故。能如實知諸有情類。略心散心。或善或不善。或無記。佛言。善現。一切如來應正等覺。依深般若波羅蜜多。如實知法性。

中法性。尙無所有不可得。況有有情。略心散心。善不善無記而可得。善現如是如來應正等覺。依深般若波羅蜜多。由法性故。能如實知諸有情類。略心散心。或善或不善。或無記。復次善現。一切如來應正等覺。依深般若波羅蜜多。能如實知諸有情類。若略心。若散心。或善或不善。或無記。善現云何如來應正等覺。依深般若波羅蜜多。能如實知諸有情類。略心散心。或善或不善。或無記。善現。一切如來應正等覺。依深般若波羅蜜多。由盡故。離染故。滅故。斷故。寂靜故。遠離故。能如實知諸有情類。略心散心。或善或不善。或

無記時具壽善現。白佛言。世尊。云何如來應正等覺。依深般若波羅蜜多。由盡故離染。故滅故斷。故寂靜。故遠離。故能如實知諸有情類。略心散心。或善或不善。或無記。佛言。善現。一切如來應正等覺。依深般若波羅蜜多。如實知盡離染滅斷寂靜遠離中盡等性。尚無所有不可得。況有有情。略心散心。善不善無記可得。善現。如是如來應正等覺。依深般若波羅蜜多。由盡離染滅斷寂靜遠離故。能如實知諸有情類。略心散心。或善或不善。或無記。復次。善現。一切如來應正等覺。依深般若波羅蜜多。能如實知諸有情類。有

貪心。離貪心。有瞋心。離瞋心。有癡心。離癡心。時具壽
善現白佛言。世尊。云何如來應正等覺。依深般若波
羅蜜多。能如實知諸有情類。有貪心。離貪心。有瞋心。
離瞋心。有癡心。離癡心。佛言。善現。一切如來應正等
覺。依深般若波羅蜜多。能如實知彼諸有情。有貪心
如實性。非有貪心。非離貪心。何以故。如實性中心心
所法。尚無所有不可得。況有有貪心。離貪心。可得。亦
如實知彼諸有情。有瞋心。如實性。非有瞋心。非離瞋
心。何以故。如實性中心心所法。尚無所有不可得。況
有有瞋心。離瞋心。可得。亦如實知彼諸有情。有癡心。

如實性。非有癡心。非離癡心。何以故。如實性中心心
所法。尚無所有。不可得。況有有癡心。離癡心可得。善
現。如是如來。應正等覺。依深般若波羅蜜多。能如實
知彼諸有情。有貪心。有瞋心。有癡心。善現。一切如來
應正等覺。依深般若波羅蜜多。能如實知彼諸有情。
離貪心。如實性。非離貪心。非有貪心。何以故。如實性
中心心所法。尚無所有。不可得。況有離貪心。有貪心
可得。亦如實知彼諸有情。離瞋心。如實性。非離瞋心。
非有瞋心。何以故。如實性中心心所法。尚無所有。不
可得。況有離瞋心。有瞋心可得。亦如實知彼諸有情。

離癡心如實性。非離癡心。非有癡心。何以故。如實性中心心所法。尚無所有不可得。況有離癡心有癡心可得。善現。如是如來應正等覺。依深般若波羅蜜多。能如實知彼諸有情。離貪心。離瞋心。離癡心。復次。善現。一切如來應正等覺。依深般若波羅蜜多。能如實知彼諸有情。有貪瞋癡心。非有貪瞋癡心。非離貪瞋癡心。何以故。如是二心不和合故。善現。一切如來應正等覺。依深般若波羅蜜多。能如實知彼諸有情。離貪瞋癡心。非離貪瞋癡心。非有貪瞋癡心。何以故。如是二心不和合故。善現。如是如來應正等覺。依深般若

若波羅蜜多。能如實知彼諸有情。有貪心。離貪心。有
瞋心。離瞋心。有癡心。離癡心。復次。善現。一切如來應
正等覺。依深般若波羅蜜多。能如實知諸有情類。所
有廣心。時具壽善現。白佛言。世尊。云何如來應正等
覺。依深般若波羅蜜多。能如實知彼諸有情。所有廣
心。佛言。善現。一切如來應正等覺。依深般若波羅蜜
多。能如實知彼諸有情。所有廣心。無廣無狹。無增無
減。無去無來。所以者何。心之自性。畢竟離故。非廣非
狹。非增非減。非去非來。何以故。心之自性。都無所有。
竟不可得。何廣何狹。何增何減。何去何來。善現。如是。

如來應正等覺。依深般若波羅蜜多。能如實知彼諸有情所有廣心。復次善現。一切如來應正等覺。依深般若波羅蜜多。能如實知諸有情類所有大心。時具壽善現白佛言。世尊。云何如來應正等覺。依深般若波羅蜜多。能如實知彼諸有情所有大心。佛言善現。一切如來應正等覺。依深般若波羅蜜多。能如實知彼諸有情所有大心。無大無小。無去無來。無生無滅。無住無異。無染無淨。所以者何。心之自性。畢竟離故。佛不見彼有大有小。有去有來。有生有滅。有住有異。有染有淨。何以故。心之自性。都無所有。竟不可得。何

大何小。何去何來。何生何滅。何住何異。何染何淨。善現。如是如來應正等覺。依深般若波羅蜜多。能如實知彼諸有情。所有大心。復次。善現。一切如來應正等覺。依深般若波羅蜜多。能如實知諸有情類。所有無量心。時具壽善現。白佛言。世尊。云何如來應正等覺。依深般若波羅蜜多。能如實知彼諸有情。所有無量心。佛言。善現。一切如來應正等覺。依深般若波羅蜜多。能如實知彼諸有情。所有無量心。非有量。非無量。非住。非不住。非去。非不去。所以者何。心之自性。畢竟離故。佛不見彼有量。有無量。有住。有不住。有去。有不

去何以故。無量心性。無所依止。如何可說。有量有無量。有住有不住。有去有不去。此心自性。既無所依。亦無所有。竟不可得。何有量。何無量。何住。何不住。何去。何不去。善現。如是如來應正等覺。依深般若波羅蜜多。能如實知。彼諸有情。所有無量心。復次。善現。一切如來應正等覺。依深般若波羅蜜多。能如實知。諸有情類。所有無見無對心。時具壽善現。白佛言。世尊。云何如來應正等覺。依深般若波羅蜜多。能如實知。彼諸有情。所有無見無對心。佛言。善現。一切如來應正等覺。依深般若波羅蜜多。能如實知。彼諸有情。所有

無見無對心。皆無心相。何以故。以一切心自相空故。善現。如是如來應正等覺。依深般若波羅蜜多。能如實知彼諸有情。所有無見無對心。復次。善現。一切如來應正等覺。依深般若波羅蜜多。能如實知諸有情類。所有無色不可見心。時具壽善現白佛言。世尊。云何如來應正等覺。依深般若波羅蜜多。能如實知彼諸有情。所有無色不可見心。佛言。善現。一切如來應正等覺。依深般若波羅蜜多。能如實知彼諸有情。所有無色不可見心。諸佛五眼。皆不能見。何以故。以一切心自性空故。善現。如是如來應正等覺。依深般若

波羅蜜多。能如實知彼諸有情。所有無色不可見心。復次善現。一切如來應正等覺。依深般若波羅蜜多。能如實知諸有情類心心所法。若出若沒。若屈若伸。時具壽善現。白佛言。世尊。云何如來應正等覺。依深般若波羅蜜多。能如實知彼諸有情心心所法。若出若沒。若屈若伸。佛言。善現。一切如來應正等覺。依深般若波羅蜜多。能如實知彼諸有情。出沒屈伸心心所法。皆依色受想行識生善現。如是如來應正等覺。依深般若波羅蜜多。能如實知彼諸有情心心所法。若出若沒。若屈若伸。謂諸如來應正等覺。依深般若

常。此是諦實。餘皆愚妄。或依想執我及世間亦常亦無常。此是諦實。餘皆愚妄。或依想執我及世間非常非無常。此是諦實。餘皆愚妄。或依行執我及世間無常。此是諦實。餘皆愚妄。或依行執我及世間亦常亦無常。此是諦實。餘皆愚妄。或依行執我及世間非常非無常。此是諦實。餘皆愚妄。或依識執我及世間常。此是諦實。餘皆愚妄。或依識執我及世間無常。此是諦實。餘皆愚妄。或依識執我及世間亦常亦無常。此是諦實。餘皆愚妄。或依識執我及世間非常非無常。此是諦實。餘皆愚妄。

實。餘皆愚妄。或依色執我及世間有邊。此是諦實。餘皆愚妄。或依色執我及世間無邊。此是諦實。餘皆愚妄。或依色執我及世間亦有邊亦無邊。此是諦實。餘皆愚妄。或依色執我及世間非有邊非無邊。此是諦實。餘皆愚妄。或依受執我及世間無邊。此是諦實。餘皆愚妄。或依受執我及世間亦有邊亦無邊。此是諦實。餘皆愚妄。或依受執我及世間非有邊非無邊。此是諦實。餘皆愚妄。或依想執我及世間無邊。此是諦實。餘皆愚妄。或依想執我及世間有邊。此是諦實。餘皆愚妄。或依想執我及世間無邊。此是諦實。餘皆愚妄。

妄。或依想執我及世間亦有邊亦無邊。此是諦實。餘皆愚妄。或依想執我及世間非有邊非無邊。此是諦實。餘皆愚妄。或依行執我及世間有邊。此是諦實。餘皆愚妄。或依行執我及世間無邊。此是諦實。餘皆愚妄。或依行執我及世間亦有邊亦無邊。此是諦實。餘皆愚妄。或依識執我及世間有邊。此是諦實。餘皆愚妄。或依識執我及世間無邊。此是諦實。餘皆愚妄。或依識執我及世間亦有邊亦無邊。此是諦實。餘皆愚妄。或依識執我及世間非有邊非無邊。此是諦

實。餘皆愚妄。或依色執命者卽身。此是諦實。餘皆愚妄。或依色執命者異身。此是諦實。餘皆愚妄。或依受執命者卽身。此是諦實。餘皆愚妄。或依受執命者異身。此是諦實。餘皆愚妄。或依想執命者卽身。此是諦實。餘皆愚妄。或依想執命者異身。此是諦實。餘皆愚妄。或依行執命者卽身。此是諦實。餘皆愚妄。或依行執命者異身。此是諦實。餘皆愚妄。或依識執命者卽身。此是諦實。餘皆愚妄。或依識執命者異身。此是諦實。餘皆愚妄。或依色執如來死後有。此是諦實。餘皆愚妄。或依色執如來死後非有。此是諦實。餘皆愚妄。

或依色執如來死後亦有亦非有。此是諦實。餘皆愚
妄。或依色執如來死後非有非非有。此是諦實。餘皆
愚妄。或依受執如來死後有。此是諦實。餘皆愚妄。或
依受執如來死後非有。此是諦實。餘皆愚妄。或依
執如來死後亦有亦非有。此是諦實。餘皆愚妄。或依
受執如來死後非有非非有。此是諦實。餘皆愚妄。或
依想執如來死後有。此是諦實。餘皆愚妄。或依想執
如來死後非有。此是諦實。餘皆愚妄。或依想執如來
死後亦有亦非有。此是諦實。餘皆愚妄。或依想執如
來死後非有非非有。此是諦實。餘皆愚妄。或依行執

如來死後有。此是諦實。餘皆愚妄。或依行執如來死
後非有。此是諦實。餘皆愚妄。或依行執如來死後亦
有亦非有。此是諦實。餘皆愚妄。或依行執如來死後
非有非非有。此是諦實。餘皆愚妄。或依識執如來死
後有。此是諦實。餘皆愚妄。或依識執如來死後非有。
此是諦實。餘皆愚妄。或依識執如來死後亦有亦非
有。此是諦實。餘皆愚妄。或依識執如來死後非有非
非有。此是諦實。餘皆愚妄。善現。如是如來應正等覺。
依深般若波羅蜜多。能如實知彼諸有情心心所法。
若出若沒。若屈若伸。復次善現。一切如來應正等覺。

於深般若波羅蜜多。如實知色。亦如實知受想行識。時具壽善現。白佛言。世尊。云何如來應正等覺。依深般若波羅蜜多。如實知色。亦如實知受想行識。佛言。善現。一切如來應正等覺。依深般若波羅蜜多。如實知色。如真如。無變異。無分別。無相狀。無作用。無戲論。無所得。亦如實知受想行識。如真如。無變異。無分別。無相狀。無作用。無戲論。無所得。善現。如是如來應正等覺。依深般若波羅蜜多。如實知色。亦如實知受想行識。復次。善現。五蘊真如。卽有情真如。有情真如。卽出沒屈伸真如。出沒屈伸真如。卽五蘊真如。五蘊真

如。卽十二處真如。十二處真如。卽十八界真如。十八
界真如。卽一切法真如。一切法真如。卽六波羅蜜多
真如。六波羅蜜多真如。卽三十七菩提分法真如。三
十七菩提分法真如。卽十八空真如。十八空真如。卽
八解脫真如。八解脫真如。卽八勝處真如。八勝處真
如。卽九次第定真如。九次第定真如。卽如來十力真
如。如來十力真如。卽四無所畏真如。四無所畏真如。
卽四無礙解真如。四無礙解真如。卽大慈大悲大喜
大捨真如。大慈大悲大喜大捨真如。卽十八佛不共
法真如。十八佛不共法真如。卽一切智真如。一切智

眞如。卽道相智眞如。道相智眞如。卽一切相智眞如。
一切相智眞如。卽善法眞如。善法眞如。卽不善法眞
如。不善法眞如。卽無記法眞如。無記法眞如。卽世閒
法眞如。世閒法眞如。卽出世閒法眞如。出世閒法眞
如。卽有漏法眞如。有漏法眞如。卽無漏法眞如。無漏
法眞如。卽有爲法眞如。有爲法眞如。卽無爲法眞如。
無爲法眞如。卽過去法眞如。過去法眞如。卽未來法
眞如。未來法眞如。卽現在法眞如。現在法眞如。卽預
流果眞如。預流果眞如。卽一來果眞如。一來果眞如。
卽不還果眞如。不還果眞如。卽阿羅漢果眞如。阿羅

漢果眞如。卽獨覺菩提眞如。獨覺菩提眞如。卽一切
菩薩摩訶薩行眞如。一切菩薩摩訶薩行眞如。卽諸
佛無上正等菩提眞如。諸佛無上正等菩提眞如。卽
一切如來應正等覺眞如。一切如來應正等覺眞如。
卽一切有情眞如。善現若一切如來應正等覺眞如。
若一切有情眞如。若一切法眞如。無二無二處。是一
眞如。如是眞如。無別異故。無壞無盡。不可分別。善現。
一切如來應正等覺。依深般若波羅蜜多。證一切法
眞如究竟。乃得無上正等菩提。由此故說甚深般若
波羅蜜多。能生諸佛。是諸佛母。能示諸佛世閒實相。

善現。如是如來應正等覺。依深般若波羅蜜多。能如實覺知一切法眞如。不虛妄性。不變異性。由如實覺眞如相。故說名如來應正等覺。時具壽善現白佛言。世尊。甚深般若波羅蜜多。所證一切法眞如。不虛妄性。不變異性。極爲甚深。難見難覺。世尊。一切如來應正等覺。皆用一切法眞如。不虛妄性。不變異性。顯示分別諸佛無上正等菩提世尊。一切法眞如甚深。誰能信解。唯有不退位菩薩摩訶薩。及具正見漏盡阿羅漢。聞佛說此甚深眞如。能生信解。如來爲彼依。自所證眞如之相。顯示分別。佛言。善現。如是如是。如汝

所說所以者何。善現。眞如無盡。是故甚深。唯有如來現等正覺無盡。眞如。時具壽善現。白佛言。世尊。佛由誰證無盡。眞如。佛言。善現。佛由眞如。能證如是無盡。眞如。時具壽善現。復白佛言。世尊。如來證誰無盡。眞如。佛言。善現。證一切法無盡。眞如。善現。一切如來應正等覺。證得一切法無盡。眞如。故獲得無上正等菩提。爲諸有情分別顯示一切法眞如相。由此故名眞實說者。

第二分示相品第四十七之一

爾時三千大千世界。所有欲界色界諸天。各以種種

天妙花香。遙散世尊而爲供養。來詣佛所。頂禮雙足。卻住一面。俱白佛言。世尊。所說甚深般若波羅蜜多。以何爲相。爾時佛告諸天眾言。甚深般若波羅蜜多。以空爲相。甚深般若波羅蜜多。以無相爲相。甚深般若波羅蜜多。以無願爲相。甚深般若波羅蜜多。以無造無作爲相。甚深般若波羅蜜多。以無生無滅爲相。甚深般若波羅蜜多。以無染無淨爲相。甚深般若波羅蜜多。以無羅蜜多。以無性無相爲相。甚深般若波羅蜜多。以無依無住爲相。甚深般若波羅蜜多。以非斷非常爲相。甚深般若波羅蜜多。以非一非異爲相。甚深般若波

羅蜜多。以無來無去爲相。甚深般若波羅蜜多。以虛空爲相。甚深般若波羅蜜多。有如是等無量諸相。諸天當知如是諸相。一切如來應正等覺。爲欲饒益世閒天人阿素洛等。依世俗諦。以想等想。施設言說。不依勝義。諸天當知甚深般若波羅蜜多如是諸相。世閒天人阿素洛等。皆不能壞。何以故。世閒天人阿素洛等。皆有相故。諸天當知諸相不能破壞諸相。諸相不能了知諸相。諸相不能破壞無相。諸相不能了知無相。無相不能破壞諸相。無相不能了知諸相。無相不能破壞無相。無相不能了知無相。何以故。若相若

無相。若相無相。皆無所有。能破能知。所破所知。破者知者。不可得故。諸天當知。如是諸相。非色所作。非受想行識所作。非眼處所作。非耳鼻舌身意處所作。非色處所作。非聲香味觸法處所作。非眼界所作。非耳鼻舌身意界所作。非色界所作。非聲香味觸法界所作。非眼識界所作。非耳鼻舌身意識界所作。非眼觸所作。非耳鼻舌身意觸所作。非眼觸爲緣所生諸受所作。非耳鼻舌身意觸爲緣所生諸受所作。非布施波羅蜜多所作。非淨戒安忍精進靜慮般若波羅蜜多所作。非內空所作。非外空。內外空。空空。大空。勝義

空。有爲空。無爲空。畢竟空。無際空。散無散空。本性空。自共相空。一切法空。不可得空。無性空。自性空。無性自性空所作。非眞如所作。非法界法性。不虛妄性。不變異性。平等性。離生性。法定法住。實際虛空界。不思議界所作。非苦聖諦所作。非集滅道聖諦所作。非四靜慮所作。非四無量四無色定所作。非八解脫所作。非八勝處。九次第定。十遍處所作。非四念住所作。非四正斷。四神足。五根。五力。七等覺支。八聖道支所作。非空解脫門所作。非無相無願解脫門所作。非淨觀地所作。非種性地。第八地。具見地。薄地。離欲地。已辦。

地。獨覺地。菩薩地。如來地所作。非極喜地所作。非離
垢地。發光地。燄慧地。極難勝地。現前地。遠行地。不動
地。善慧地。法雲地所作。非五眼所作。非六神通所作。
非如來十力所作。非四無所畏。四無礙解。大慈大悲。
大喜大捨。十八佛不共法所作。非三十二大士相所
作。非八十隨好所作。非無忘失法所作。非恆住捨性
所作。非一切陀羅尼門所作。非一切三摩地門所作。
非一切智所作。非道相智一切相智所作。諸天當知
如是諸相。非天所作。非非天所作。非人所作。非非人
所作。非天所有。非非天所有。非人所有。非非人所有。

非有漏。非無漏。非世間。非出世間。非有爲。非無爲。無所繫屬。不可宣說。諸天當知甚深般若波羅蜜多。遠離眾相。不應問言甚深般若波羅蜜多。以何爲相。汝諸天等。於意云何。設有問言虛空何相。如是發問。爲正問不。諸天荅言不也。世尊不也。善逝何以故。虛空無體。無相無爲。不應問故。世尊告曰。甚深般若波羅蜜多。亦復如是。不應爲問。然諸法相。有佛無佛。法界法住。佛於此相。如實覺知。故名如來。應正等覺。時諸天眾。俱白佛言。如來所覺如是諸相。極爲甚深。難見難覺。如來現覺如是相故。於一切法無礙智轉。一切

如來應正等覺。住如是相。分別開示甚深般若波羅蜜多。爲諸有情集諸法相。方便開示。令於般若波羅蜜多。得無礙智。希有世尊。甚深般若波羅蜜多。是諸如來應正等覺常所行處。去來今世。一切如來應正等覺。行是處故。證得無上正等菩提。爲諸有情。分別開示一切法相。謂分別開示色相。分別開示受想行識相。分別開示眼處相。分別開示耳鼻舌身意處相。分別開示色處相。分別開示聲香味觸法處相。分別開示眼界相。分別開示耳鼻舌身意界相。分別開示色界相。分別開示聲香味觸法界相。分別開示眼識

界相。分別開示耳鼻舌身意識界相。分別開示眼觸相。分別開示耳鼻舌身意觸相。分別開示眼觸爲緣所生諸受相。分別開示耳鼻舌身意觸爲緣所生諸受相。分別開示布施波羅蜜多相。分別開示淨戒安忍精進靜慮般若波羅蜜多相。分別開示內空相。分別開示外空。內外空。空空。大空。勝義空。有爲空。無爲空。畢竟空。無際空。散無散空。本性空。自共相空。一切法空。不可得空。無性空。自性空。無性自性空相。分別開示真如相。分別開示法界法性。不虛妄性。不變異性。平等性。離生性。法定法住。實際虛空界。不思議界。

相。分別開示苦聖諦相。分別開示集滅道聖諦相。分別開示四靜慮相。分別開示四無量四無色定相。分別開示八解脫相。分別開示八勝處九次第定十遍處相。分別開示四念住相。分別開示四正斷。四神足。五根。五力。七等覺支。八聖道支相。分別開示空解脫門相。分別開示無相無願解脫門相。分別開示淨觀地相。分別開示種性地。第八地。具見地。薄地。離欲地。已辦地。獨覺地。菩薩地。如來地相。分別開示極喜地相。分別開示離垢地。發光地。燄慧地。極難勝地。現前地。遠行地。不動地。善慧地。法雲地相。分別開示五眼。

相。分別開示六神通相。分別開示如來十力相。分別開示四無所畏。四無礙解。大慈大悲。大喜大捨。十八佛不共法相。分別開示三十二大士相相。分別開示八十隨好相。分別開示無忘失法相。分別開示恆住捨性相。分別開示一切陀羅尼門相。分別開示一切三摩地門相。分別開示預流果相。分別開示一來不還阿羅漢果獨覺菩提相。分別開示一切菩薩摩訶薩行相。分別開示諸佛無上正等菩提相。分別開示一切智相。分別開示道相智一切相智相。

大般若波羅蜜多經卷第四百四十二

音釋

狹

侯夾切
窄狹也